

四庫全書

集部

欽定四庫全書

集部

虛舟集卷五

詳校官國子監奇業<sub>臣</sub>納麟寶

中書<sub>臣</sub>劉源溥覆勘

總校官原任中允<sub>臣</sub>王燕緒

校對官中書<sub>臣</sub>康儀鈞

謄錄監生<sub>臣</sub>戈廷樞

欽定四庫全書

虛舟集卷四

明 王偁 撰

五言排律

山居約馬自牧同隱

卜築遠囂塵松泉洛澗濱山雲常共醉海月不羞貧看  
竹琴留客尋芝鹿傍人露巾裁落芟野飯薦香芹樹變  
啼園鳥溪遊縱壑鱗蕙牀眠薄暝桂酒賞芳春入社高

僧共尋山短屐頻市城能掃迹遲爾結為隣

夏日同呂民部宴臺山閣書贈邑令沈丙

林吹遶橫塘山亭挹衆芳琴尊延勝引環佩集仙郎高  
詠揮瓊塵飛泉激羽觴葛輕衣入暑玉冷簟浮湘鳳渺  
辭丹掖鸞緘貯縹囊羣峰屏遍列一水鏡牽長寶瑟頻  
調柱清歌迥繞梁澗花開互對山鳥下成行已判徵仙  
事還疑到醉鄉染塵慚汨沒畢景恣徜徉桂域流初魄  
松梢促晚涼幽期殊未已書此報河陽

贈童將軍

聖德垂文統開疆仗武臣熊羆偏北渭崧嶽再生申控  
節三邊靜謳歌萬國春策勳來汗馬剖券寄雄闈何處  
推名閥淮陽識異人起家龍劍舊錫命虎符新略地功  
名在專城寵渥臻朔方推鄧禹南土戴曹彬事業誰能  
擬賢郎更絕倫鳳毛看鶩鶩驥種得麒麟勇略仍無匹  
雄韜動有神聲名傳此日光彩擅常陳閫外今無事邊  
陲早控塵轆轤閒夜月睥睨倚秋旻國士延毛遂華筵

名都說五羊流美頌百粵仰深仁自笑飄蓬客難同入  
幕賓轅門叨接猛斗篆未誇秦王聚登樓處相如作賦  
晨不因知己戀誰作浪遊身伏櫪心猶壯寧鞴氣未馴  
素書如可試黃石舊為隣

寶珠蘭若

萬花明晚嶂一逕靄天香問法逢龍勝尋山到鴈堂梵  
輪標月相石鏡讓珠光野興看雲逸松泉捲幔涼洗心  
依覺苑作禮面空王初地超凡品冷然萬慮忘

蔣山法會瑞應詩應制作

寶地奉金仙璇宮啟梵筵真僧騰異域開士唱三緣說  
法雲成蓋談經花雨天祥光凝彩絢甘露瀉珠圓天樂  
憑虛下神燈徹夜懸勝因濟妙筏覺路指迷川祗樹春  
光溢靈山會儼然願茲宏至化皇運共千年

白鹿應制

樂園歌周室呈祥出漢圻神胚金毓秀瑞采玉為姿顧  
兔寧堪匹祥鳥未足竒露毛偏濯濯霜角自離離漫點

蒼崖雪曾銜紫嶺芝來依琪苑靜馴傍玉階宜海嶠遺  
仙跡窮荒貢赤墀何如昭景貺重覩聖明時

送人戍邊

玉勒浮雲騎雕韃明月弓日邊辭帝輦天際逐沙蓬百  
戰兵符動三門將略雄戈矛明積雪旌旆疊高風朔漠  
窮陰外幽關落照中壯懷何以贈劍氣欲吹虹

挽林思和校文

冠冕長林後詩書百粵尊九侯傳世澤雙闕表名門學



海文風盛鬢宮教雨存朋簪方濟濟逝水竟泫泫寂寞  
餘詩社飄零散酒樽琴書徒爾恨鐘鼎更誰論夜月看  
歸鶴秋猿伴旅魂園林荒竹樹風雨敗蘭蓀走訃驚千  
里悲歌向九原猶疑騎列宿箕尾不堪捫

題天台梁氏聚青山房

絕巘隣滄島中峰接上台林間別阜出窻外聚青來選  
勝宜招隱棲幽異鑿坯白雲華頂鶴瀑布石屏雷羽客  
停鸞吹仙人共酒杯烟霞林鹿伴冠蓋嶺猿猜自笑羈

塵內何由避俗媒  
憑題紫芝曲寄謝赤城隈

題嘉禾楊郡守綠野亭

南藩開別邸五馬駐仙輶  
地接三吳壯山連百粵青簪  
纓延上客詩酒聚文星  
妬舞花當戶傳歌鳥近屏  
園丁供核篚野老獻茶經  
架展黃封軸門題墨客銘  
白雲隨捲幔華月似窺樗  
雅趣林泉洽幽懷海岳冥  
徐生高士宅揚子草玄亭  
未足同風調徒應襲露螢  
須知潁川政鳴鳳下郊坰

呈陳司馬

大將分雄閫名卿出上台  
六韜資廟略萬里掃炎埃  
鐵騎如雲集樓船際曉開  
月將弓影滿霜逐劍鋒摧  
寵賚當陽節人憐定遠材  
指麾停羽策談笑許龍媒  
銅柱功寧羨金臺志不回  
豈伊專鉞斧更爾賴鹽梅  
自笑疲鴛甚聊因附驥來  
未攜孫楚策屢接禰衡杯  
汲引寧忘自吹噓  
幸見陪酬恩看玉劍  
千里動風雷

環壁軒為劉僉憲題

憲節依南紀開軒得最幽引泉窺蜃脈鑿地應龜謀團  
魄疑初墮輪光訝未收不隨方沼合宜傍月江流荷蓋  
侵書幌芹香點客裘漫同瞻泮水非是奠圓丘蒲穀生  
當異琮璜勢欲侔奎文時貫戶雲漢半藏隕色媚沉珠  
浦輝聯釣玉洲探源窮妙理觀化仰前修映采迴軫鷺  
忘機狎野鷗鑑容堪整佩濯足詫垂鈎檻俯花如笑橋  
成木自樛燕衝飛絮入魚唵亂萍浮潤溥臺前栢聲諧  
乍外瓊瑩深瑕不染光重價難酬才子誇神遇羣公事

勝遊賦詩偕酌洞載酒擬消愁涼思通規牖清源得上  
遊懸車曾有約揮棹倚高秋

游海珠寺示同遊文憲使周僉憲

絕島波心見樓身玉鏡中欲觀鼉背日還仗鷓樓風客  
思員壺外雲程若木東蜃光晴作霧海氣晝成虹僧刹  
蛟龍護神珠水月通同遊多逸侶歸棹擬乘空

五言律詩

塞上曲

飛雪迥千里春來草不生  
曉辭驃騎幕夜薄左賢營  
性命酬恩籠心魂戀苦旌  
誰知麟閣上青簡貯芳名

其二

中夜旄頭躍將軍遠戍邊  
磧昏旗影暗水滑馬蹄穿  
劍拂秋霜冷弓彎塞月圓  
直須清大漠萬里勒燕然

其三

代馬風雲色吳駒霜雪明  
三邊傳警候萬里事橫行  
擬促陰山騎遙連瀚海兵  
願開沙漠北持答泰階平

其四

遠戍金微道一上單于臺  
關門秋色斷羌笛夜聲哀  
少婦龍沙夢長安鶴使回  
祇今青海月流影碧天來

隴頭水

隴底望秦關蕭蕭隴水寒  
照人猶帶恨飲馬不成湍  
落日邊塵合秋風候騎殘  
誰磨三尺劍直為斬樓蘭

楊柳枝

春光曉漸饒楊柳暗宮橋  
嫩葉凝愁黛纖枝倦舞腰  
祇

應悲成邃那解綰蘭橈更待花如霰紅顏為爾凋

梅花落

青樓嘆落梅獨起自徘徊帶雪粘歌扇因風上鏡臺晚  
粧誰更點邊角正堪哀望斷尋香徑依依滿綠苔

小垂手

秦女騁妖嬈春風步翠翹只疑花作臉更訝柳為腰燭  
暗花鈿墮風輕羅帶飄自矜纖弱態不羨掌中嬌

巫山高



巫山不可望望極使人悲樹暗啼猿峽雲空神女祠秋  
聲留別恨夜月悵佳期欲問高唐事惟應宋玉知

入西山訪張隱士

兩岬噴飛瀑結屋烟蘿裡山人不冠屨客至同隱几獨  
鶴海上歸孤雲澗中起淨掃白石牀風來墮松子

晚歸湖上

一逕幽尋悠然世外心不緣流水泛那識落花深潭  
影澄天鏡松聲韻素琴前林烟磬發歸晚月沉沉

偶行山中得清冷泉

萬籟曉俱寂風泉有遠音  
偶隨清嶂去因到白雲深  
噴薄疑飛雪冷清可照心  
坐來天影澹一曲韻瑤琴

山寺尋僧

尋山憶慧能問偈遇真僧  
竹覆山門雪花藏古殿  
燈千家供法食一衲絰  
踈藤不是遺經呪多應  
悟上乘

尋鄭道士坐清暉閣

吟秋入翠微高閣坐清暉  
鴻寶傳真訣清齋話息機  
磻

雲生野屐山雨拂塵衣自是支離久依方早有歸

憶陳昇

京國一為別橋門十載春  
齏鹽朝共飯風雨夜連茵  
玉樹誰先折泉臺竟不晨  
空將知己淚西望洒風塵

過董江臺懷從範

陳君才八斗何謝建安人不折  
月中桂誰憐泉下身高臺枕  
流水故業委荒蕪忽聽山陽  
笛淒清滿四隣

送夏廷簡宿怡山蘭若

別路繞珠林秋來落葉深一燈今夜雨千里故人心已  
覺空門幻還驚旅况侵坐聞鐘鼓曙離思轉沉沉

陸氏山池

淡淡牽銀藻娟娟種玉蓮誰聞照膽鏡中有洗心泉萍  
散山流影雲收月墮天願隨鷗鷺侶薄暮宿寒烟

送黃尊師歸華山

我送金華子西歸玉女峰瑤笙飛一鶴寶劍佩雙龍人  
問丹砂訣天清碧澗鐘遙知騎白鹿韓衆定相逢

送人以故將召用

秋風大道傍立馬盡餘觴興逐孤雲遠情隨去路長  
廉頗思趙士漢主憶馮唐莫奏桓伊笛蕭條兩鬢霜

楊秀才幽居

楊子幽居處開窓面遠空水喧明鏡裡雲落畫屏中  
捲幔留山月揮絃送晚鴻何人問竒字載酒野橋東

白雲寺贈僧

道林說法處應在白雲邊宴坐度小劫冥觀入大千諸

天花雨遍雙樹慧燈懸  
何日東林社相期種白蓮

詠毛女

拂黛逃秦苑羞蟬入漢年  
羽毛滋異藥山谷遇真仙  
夜月思金屋春風漱玉泉  
折花壽王母羸女解相憐

詠西施

浣紗白石上本住越溪濱  
一入吳王苑遂為傾國人  
春華嬌艷質秋水助精神  
寄謝東隣女雙蛾莫效顰

朝退懷南湖草堂寄舍弟及舊社諸游好

朝回獨掩扉高卧息塵機  
春色如憐客飛花故點衣  
雁行驚別久鶴病憶羣稀  
何日南湖上春雲滿棹歸

題金道士丹室

石洞掃烟霞仙壇覆落花  
人間尋鶴侶天上駐鸞車  
瑤圃桃成實金盤裏似瓜  
待予休物累從爾問丹砂

立春早朝賜醕答鄭編修之作

玉歷新頒後千門曉色鮮  
青雲干舜呂和氣入堯年  
高品初傳勅中庖預列筵  
愧非枚乘侶雨露沐恩偏

大祀候蹕有成

天上開黃道雲間落鳳韶侍臣瞻豹尾列從護鷄翹羨  
錫皇心豫春迴瑞靄飄萬方雨露鼓舞頌軒堯

贈羽林翟大

十二羽林郎星文映上蒼承恩當列仗走馬出長楊夜  
宿平原里春遊俠客場袖中徐匕首萬里報君王

閣下贈同官王洪

王子才無敵冰壺映世稀賦成金韻遠詩奪錦袍歸入



侍趨卅禁承恩拜瑣闈茂陵慙久病因欲解朝衣

其二

日射黃金闕春回白玉堂地分清切處人在碧雲鄉彩  
筆傳天語宮袍染露香明朝還獻賦遲爾沐恩光

寄茅山道士

天轉招搖近山藏句曲深龍歸丹井暗松覆碧壇陰賣  
藥留金訣看雲抱玉琴夜來笙鶴下相應步虛吟

和王舜舉春日襄陽之作因送之歸

漢水千年綠襄陽二月時人歌大堤曲春到習家池且  
縱山公醉寧同叔子悲葛疆今已老歸馬莫教遲

賦得邊城雪送行人胡敬使靈武

萬里燉煌道三春雪未晴送君走馬去遙似踏花行度  
蹟迷沙遠臨關訝月明故鄉飛鴈絕相送若為情

賦得驄馬送黃采巡按北京兼寄蕭福王選二豸

史

錦勒玉花驄長鳴向北風已看千里去坐覺萬羣空敵

玉燕山遠鳴鑿薊水通使君同攬轡早晚奏奇功

贈御醫蔣彥文

昔年遊海上晚歲住京華肘秘盤囊訣爐存伏火砂進  
方親御宸種藥借隣家欲問廬山杏年來幾度花

挽周員外元

早歲擅芳名中年一宦成鶯花平日淚烟月故山情落  
魄嵒中散猖狂阮步兵可憐埋玉處芳草傍誰生

送李校尉致仕還江左

雄劍委龍鳴，關河白髮生。  
功成百戰後，老去一身輕。  
夜月桓伊笛，秋風驃騎營。  
燕歌何處寫，曲罷有餘情。

送趙友同還華亭時水泛三吳

積水渺無際，送君江上還。  
九峰何處所，迢遞白雲間。  
舊業菱荷在，秋風鷗鷺閒。  
定知三泖月，相見一開顏。

送人之昆陵

興盡一杯酒，相看欲別時。  
孤帆乘吹發，一鴈度江遲。  
千古蘭陵令，秋風季子祠。  
勝遊多感慨，為爾寄遐思。

書懷寄友人還建安

游乏金張援官無子孟資庖人羞獨割尸祝漫相知此  
夜金陵月明朝瓊樹枝武夷山水郡相憶在題詩

送友游吳適越

斗酒興不淺南遊幾日迴擔囊無俗物訪古及吳臺腰  
下延陵劔手中張翰杯若逢梅福問相與上天台

送平直之沔陽學正

楚澤三秋近荆門一望開沔流緣泮入巫樹擁屏來共

訝平當老誰憐宋玉才鳳歌時有客狂狷待君裁

舟中贈司馬秀才

才子茂陵客何年賦遠遊家藏封禪草身著鸚鵡裘未  
贈王祥劍先同郭泰舟明朝霄漢上一鷄看橫秋

贈妓

白雪調歌曲芳蘭託慧心舞迴香影亂笑掩黛痕深夜  
月牽情夢秋鴻覓斷音江舟司馬淚曾為一霑襟

其二

竹枝歌送君錦瑟不堪聞欲識芳心恨愁將寶帶分碧  
峰留黛墨秋水學湘裙明日陽臺上空瞻一段雲

分題賦得白櫻桃

嫩葉雕輕翠新葩倚淡粧鳥來雲度影人靜月籠香未  
擬收珠寶先應倒玉觴綸巾才欲岸微墜露華涼

賦得花影

欲拂更紛紛空香寂不聞亂迷芳蝶夢輕護錦苔紋襯  
月籠書幌因風颺舞裙莫移庭下步蹴碎一階雲

送人之蜀郡守

聞道蠶叢國西連漢隴平三年懷紫袖萬里慰蒼生夜  
月巴川靜秋風錦水清請看霜鍰試莫使雪山傾

渡揚子江

四月驚濤白扁舟發大江不因臨絕險那使壯心降天  
際羣峰碧磯頭白馬雙勝遊殊未已聊爾駐麾幢

岳陽送同官王洪中書舍人吳均入蜀

五月不可觸三巴未易行共因嚴使命同此念王程月



下猿聲斷雲中鳥道橫  
明朝相憶處夢繞錦官成

嚴州江上

短棹蕩江春春風物候新  
岸花飛送酒沙鳥近窺人  
碧樹籠青嶂芳洲點綠蘋  
因悲城市裡日日醉車塵

其二

巖子投竿處春來載酒過  
潮聲通越近山色入吳多  
沙際舟如月雲邊鳥似歌  
客程隨去住那許嘆風波

西山訪李徵士夜歸

山翠雲邊墮溪聲竹外虛尋秋窮謝屐隔水訪陶居隣  
媪供新醞家童剪夜蔬醉歸蘿草底殘月在襟裾

別宗上人

孤琴宿白粉一錫喜逢君只為譚鋒妙因悲染世氛窮  
秋燈影靚殘月梵聲聞明發身無住空山又斷雲

舟中望九華

雲錦積岩堯屏風倚碧霄猿聲聽不盡山翠望還消俗  
駕何由稅仙人不可招夜深理孤棹乘月逐歸潮

送孤處士歸四明

聞說四明路迢迢，隔剡溪天連滄海。  
闕樹擁白雲，低山憶謝公詠。  
人宜賀監，栖送君從此去，欲使宦情迷。

除夕

殘雪初消夜陽光，已報春客懷誰共。  
慰孤燭自相親，寂寞冥烟霞夢飄飄。  
霄漢身君恩何以報，來日歲華新。

送沙子進赴祿州別駕

客舍酒初香，都門柳色黃。  
一官仍別駕，萬里赴炎荒。  
江

路猿聲早山城榕葉涼遠人勞撫字且勿厭殊方

送人令南海

二月都門柳那堪縮別離雙鳧舞日下匹馬到天涯海  
氣滄溟夕山郵瘴雨時惟應南海月千里照相思

平樂溪中

一水縈銀練亂山攢劍鋒誰家孤嶼火落日古城鐘衰  
病易為感韶華何處逢平生慕幽寂對此太愁濃

五羊城遇張順論舊有懷

匹馬到炎荒逢君鬢已蒼  
邑人傳左語官樹隱殊鄉  
感舊看長劍緘情憶縹囊  
明朝愁又別天海共茫茫

其二

握手京華道相看又幾年  
宦情從淡泊鄉思共依然  
滄海浮空遠孤城落日邊  
斗槎如可借同覓閩壺仙

邕州

五管推名郡雙江接上游  
人家蠻洞曉山雨瘴烟浮  
遠客誰青眼殊方易白頭  
夜來南極上分野望牽牛

舟中懷彭詡

遠漢落星稀  
疎林驛火微  
已知去國遠  
况與故人違  
旅夢驚殘葉  
涼聲到客衣  
何時聯畫舫  
同望楚雲歸

與張從事夜坐幕府有贈

亞夫登上將  
劇孟在軍中  
敵國真堪倚  
雄姿獨數君  
詞鋒傳電檄  
劍氣動星文  
戎幕新無事  
高談坐夜分

從軍樂軍中錄示諸將

為問從軍樂  
東南早罷兵  
尚資磐石計  
同醉伏波營  
寶

玦千金換珠纓五采成却慙揚子宅終歲一書生

其二

秋原草色殘千騎擁雕鞍共道從軍樂誰歌行路難  
瑠戈揮日落玉劍抉雲寒準擬功成日同歸謁禁鑾

聞總戎破敵有作

功成指顧間一劍定諸蠻後騎方踰甸前軍已斬關  
兕徒應破膽黎庶漸開顏麟閣專相待征旗及早還

過梅關

五嶺壯炎服茲闕勝獨超  
鳥留南斗近劍倚北風遙  
夜艤商人棹晨經使者輶  
清時開柝吏山水自蕭條

五言絕句

楚調曲

君行巫陽道妾住渚宮湄  
莫戀荆臺樂輕拋桃李時

紈扇詞

皎潔渾無染團團孰與裁  
秋風原不妬四序自相催

飲牛潭



洗耳在潭下飲牛在潭上白鷺飛復來烟中立相向  
送人隱松溪

送爾松溪上猿聲樹樹聞夜涼弄溪月衣上拂松雲

寄友人

去歲春歸日與君成別離今年春又到君尚客天涯

秋江漁唱

漁舟晚唱來聲在秋江水月明曲未終前汀鷺飛起

荷露

翠盤捧明珠蕩漾圓復碎夜來明月中留得蚊人淚

題美人撲蝶圖

為惜韶華去春深出繡幃撲將花底蝶祇為妬雙飛

從劉禮部折菊花歸

三徑猶未歸東籬露華冷折得一枝來蕭蕭怨秋影

望君山

風來洞庭白雨歇君山青巴陵明月夜瑤瑟怨湘靈

附詞一闋調寄唐多令

湖水接天流君山一點浮倚丹青畫出層樓欲弔湘君  
何處也煙草色滿汀洲把酒記重遊相看漸白頭賦  
青蘋誰更悲秋却戀晚峯雲外笛滄海意付扁舟

虛舟集卷四

欽定四庫全書

虛舟集卷五

明 王偁 撰

七言律詩

登無諸釣龍臺懷古

高臺遠枕大江流  
江上雲屏宿靄收  
才子揮毫春作賦  
商人醉酒晚移舟  
空潭龍去山河改  
古殿雲寒劔戟愁  
莫向此中多感慨  
漢家陵樹已千秋

留別梅溪諸友

涼風才動芰荷衣，却憶青山賦獨歸。  
近別慈親溫省曠，乍拋酒伴醉吟稀。  
天邊鴻鴈秋雲薄，水面蒹葭夕鳥飛。  
後夜與君相憶處，蕭蕭蘿月掩荆扉。

新築草堂成有述

買得幽溪絕世塵，林間車馬到無因。  
茅廬新就堪招隱，松菊移來散及隣。  
薄暝鳥歸臨水樹，傍崖鹿趁採芝人。  
廟堂豈敢干時用，但願雲泉了此身。

草堂與山僧夜坐自牧馬大見過

移居深入水南村五柳新栽正對門  
傍岸春流沿翠篠亂藤棲鳥近黃昏  
牀頭折簡山人致燈下名香野衲焚  
童子夜深知客至隔鄰呼取醉芳尊

春暮同周元郊行宿烟霞道院時約黃生同奕

累月看花奈醉吟不知春樹變鳴禽  
偶隨芳草同閒屐靜拂孤雲響素琴  
塵世關情人事少松壇期宿夜燈深  
明朝入洞觀碁去未許樵夫得見尋

晚至鶴林寺

問訊山人指白雲，數聲烟磬隔溪聞。  
竹房燈靜知僧梵，松院苔深見鶴羣。  
聽法夜深山寂寂，吟衣上月紛紛。  
曉鐘又逐塵緣散，此地心期孰與論。

山中送陳生歸海上

洞口花飛春欲闌，玉缸携酒送君還。  
三年厭見天涯月，千里歸尋海上山。  
壯志功名看髮變，浮雲世事與心閒。  
要知別後相思意，萬壑松濤懶閉關。



登宿雲臺

一逕緣蘿到上方宿雲臺閣樹蒼蒼憑虛目送秋鴻遠  
向夕窓涵海雨涼童子見人能下拜老僧出定自焚香  
近來性癖耽禪悅長向空門禮法王

寄張員外

新年柳色滿都城僊掖朝迴聽早鶯日隱層墀殘雪在  
香傳別殿曉寒輕瑤池阿母憐方朔漢室公卿羨賈生  
獨笑長卿淹病久茂陵高卧有餘情

登古囊山辟友岩和瓢所居士之作因寄黃八聚  
何處秋吟覓遠公蒼苔古道石林東月生雙樹聞虛籟  
香繞諸天見化宮萬法已超言說外此身多在別離中  
明朝更寫三生偈去約忘機海上翁

中秋與劉大會溫陵因寄舍弟

相逢斗酒粵江濱客裡襟期有故人天上幾回今夜月  
此生空笑百年身且須縱醉清尊倒漫說憂時白髮新  
却憶鴈行同賞處故山回首一霑巾

溫陵送劉大還三山

江流慢曙入河低一尺魚箋醉懶題  
古道菊花秋草裡敗林莎井露螿啼  
空林寒影凋芳樹遠澗泉聲下碧溪  
客路相逢方絕倒馬蹄何事又東西

秋日與胡泉州會小山叢竹亭分韻得飛字

秋風江上早鴻飛桂樹團團影漸稀  
此日尊前須盡醉古來林下幾人歸  
青山烏帽情何戀翠竹黃花願不違  
更愛山亭車馬散照人蘿月自依依

客清源贈董別駕

清時不逐登壇貴，瘴海聊因作郡過。  
細柳營中辭虎竹，刺桐花底聽絃歌。  
雙旌暇日朋簪盍，別駕行春雨露多。  
自是清源山水勝，日勤車馬訪烟蘿。

山中黃博士不至因再約以寄之

秋風吹落桂花殘，寂寞淮南賦小山。  
自笑草堂魚佩冷，空將瑤水鶴書還。  
石門蘿月誰同醉，洞口松枝祇獨攀。  
明日角中能到否，呼童竹下掃柴關。

春日對酒酬鄭公啟

與君相見即相歡  
况值芳春感二難  
尊酒且邀花底醉  
流年不用鏡中看  
江頭草色侵衣袂  
雨後鶯聲滿石欄  
世事悠悠祇如此  
出門何處可彈冠

送人歸任南海

一曲長歌梁甫吟  
百年人事幾浮沉  
青雲北上功名薄  
白首南還歲月深  
贈別臨歧思解劍  
歸來相憶在鳴琴  
江頭日夜東流水  
欲識滔滔是此心

登九僊山懷林潁因寄

雪後空山一棹過  
新年草色送離歌  
心知別後登臨少  
福地重來感慨多  
谷口飛花看薄暝  
澗門啼鳥掩垂蘿  
知君亦有東山屐  
歸去雲林近若何

遊仰山寺

優鉢曇花幾樹開  
寶坊作禮面如來  
竹邊野衲叅方至  
龕裡神僧入定回  
鹿女獻芝依法苑  
鴈王銜果繞經臺  
空門且得休塵累  
何待人間變劫灰

崇川寄懋功張秀才

百尺灘頭一訪君，碧雲秋靄正紛紛。  
故人已嘆晨星少，此會翻成落葉分。  
遠樹孤城江上閉，晴空踈鴈醉中聞。  
也知西去寧親日，還有相思寄斷雲。

呈芮建安

翩翩五馬擁朱轡，遠駐旌旗嶺海間。  
不以專城居虎竹，誰當西顧慰天顏。  
訟庭落葉知秋早，階樹啼烏見吏閒。  
旦晚潁川先奏捷，大廷車劍為君頒。

與夏少府迪話別登薛老峰

新秋客裡喜相逢，絕頂登臨興不窮。  
遠嶼綠波孤島外，亂山黃葉白雲中。  
明朝霄漢應誰共，別墅琴尊此會同。  
去後重來相憶處，短筇吟倚候歸鴻。

同自牧瓢所宿張氏南樓

鳥下平蕪夕靄收，偶携江客宿層樓。  
月明清夜聞鴻鴈，窻近天河絳斗牛。  
幾杵鐘聲雲外杳，千家曙色暝中浮。  
醉來枕藉秋衿薄，疑借僊槎覓遠遊。



過舊遊有感

濕雲如醉護輕塵黃蝶東風滿四隣  
新綠只疑銷晚黛落紅猶記掩歌唇  
舞樓春去空殘日月榭香飄不見人  
欲覓梨雲僊夢遠坐臨芳沼獨傷神

秋日懷林源前輩

載酒行吟野寺秋青山去後與誰遊  
懷人獨卧雲中鳥感興頻登江上樓  
黃菊久拚陶令醉白頭重抱仲宣愁  
夜來明月還相照好寄心期到劍州

冬日與諸生登天香臺書寄王處士

拂曉登臨上翠臺  
天風吹送遠香來  
雲空碧海三山小  
臘盡寒梅一樹開  
下界人看塵劫外  
上方鐘斷白雲隈  
緱山忽憶吹簫侶  
為寫鸞絨付鶴迴

寄自牧時客林王生別館

芙蓉秋水漫魚磯  
白石蒼苔靜掩扉  
南國懷人成久別  
茂陵多病有誰依  
花飛別澗空流水  
客去高齋對落暉  
料得只應賢地主  
相看未訝故人稀

挽石泉藍公前元閩省知事

曾將孤憤負當時老判南荒衆豈知王氣已隨陵谷改  
劍歌空對海天悲秋風白髮驚殘夢落日窮泉有所思  
欲弔玄沙孤鶴遠不堪惆悵淚如絲

送蔣大尹

秋來城下柳條稀祖席官亭醉落暉小邑絃歌千室遠  
空林悵別幾人歸舟移越渚清砧候路入吳門驛火微  
此去料應承寵渥臨歧何必淚霑衣

元日早朝

鍾山瑞靄曉蒼蒼  
紫禁猶傳玉漏長  
雙闕旌旗低鳳輦  
千官環珮列鴛行  
恩光已共陽和布  
草木均霑雨露香  
獨愧此身無補報  
年年萬歲祝堯觴

閣中書贈陸員外顯

西京冠蓋日紛紛  
那得才華似陸雲  
北苑停驂時聽漏  
南宮載筆擅摛文  
龍旗影度天香近  
玉佩聲移曙色分  
獨愧才非枚乘侶  
也陪霄漢逐鸞羣

送卓民逸還越中民逸以善書客翰林者三年至  
是得請告歸

送君尊酒發都亭亭下春深柳色青別思漫縈風裡絮  
浮生慣學水中萍客程蘭棹天邊遠舊業柴扉海上扃  
若向山陰逢道士也應為寫換鷺經

駕幸大學扈從有作無似曹監諸博士

金輿旦出九重城壁水風雲氣色清千載衣冠尊俎豆  
萬方禮樂值文明橋門列士瞻天近雲路羣仙捧日行

講席更聞敷典誥願將虞夏翊昇平

退朝左掖聞鶯追和鄭紀善之作

帝城春早覺春和朝罷鶯聲送珮珂  
文羽不隨天仗散調音偏傍上林多  
嬌連菖石花前聽響雜雲韶柳外過  
却憶故園芳樹底停盃為爾罷狂歌

元夕午門侍宴

臘雪霏微柳外消天衢香靄逐人飄  
千門火樹攢珠斗五夜笙歌下碧霄  
玉醴恩頒春色早金波影浸漏聲遙

侍臣湛露將何補，願頌康哉答聖堯。

早朝同員外元賦時有祀事

花擁千官刻漏傳，蓬萊遙在五雲邊。  
星移北斗當宸極，樂動南薰捧帝筵。  
遲日漸晞仙掌露，輕風猶裊御爐烟。  
明朝海上祠金馬，紫鳳丹書下九天。

元夕黃庶子淮宅詠蓮花燈和胡學士廣韻

剪製芙蓉朵朵新，元宵分得玉堂春。  
祇疑金炬來深夜，未許青藜繼後塵。  
星萼乍移光滿座，月波才動影隨人。

年年此會逢佳賞醉落筵前紫綺巾

稷殿成侍宴和趙郎毅之作

別殿新開上苑東旌旗遙駐五雲中  
花深綺席來僊佩香逐金貂引上公  
自是衣冠逢盛世非闕歌舞樂春風  
何人賦有凌雲調明日天書許薦雄

送曾侍講祭從幸北京

羽林仙仗擁皇圻鳳輦時巡出禁闈  
萬國歌謠歸盛世兩京玉帛望天威  
相如扈蹕人皆羨賈誼匡時志不違



明日甘泉還獻賦會令列從有光輝

送戴子義之揚州幕府之作

二月都門柳未眠行人朝發廣陵船酒酣起舞停鷗奏  
惜別臨岐贈馬鞭往事玉簫明月夜江南春雨綠蕪天  
憑君早慰居民望莫學青樓覓翠鈿

晚集黃審理濟池上

池上涼風泛夕波筵前紅粉動高歌朝迴不惜清尊倒  
醉後從教白髮多寒色又驚秋社燕露香猶送晚空荷

歸鞍未許隨明月良會人生信幾何

送馬進士之姑塾

門外驪歌不忍聞城頭落葉正紛紛  
數尊白下分殘雨一棹青山宿暮雲  
吳苑砧聲霜後急杜陵秋色鴈邊分  
朝迴玉珮成行處年少心期獨憶君

送文良輔湖廣憲副擢廣東憲使

玉節重持出禁闈都門觀餞有光輝  
三湘曉色隨驄馬五嶺春雲上繡衣  
鳥樹盡隨霜後落遠人多在日邊歸

會看滄海澄清遍一鷄橫空似子稀

送林叔亮教授四明

秦淮斷鴈不堪聞惆悵官亭一送君  
尊酒暫留吳市月扁舟遙指越溪雲  
秋來幾處寒聲早海上千峰秀色分  
帳下諸生相待久未應寂寞嘆離羣

送顯上人還閩中

半生踪跡慕雲山結得真僧住世間  
夜宿孤燈隣妙梵曉隨清磬度禪關  
心通萬法緣俱寂目泯空華意自閒

此日微官牽物累更堪江上送師還

寄鳴秋趙山人兼似幻居閩士

石橋低覆薜蘿陰澗戶虛窻憶醉吟書寄遠公林下偈  
調高中散竹邊琴藥欄春去啼禽換茶竈秋來落葉深  
別後此情何所似題封一寄故人心

送龍河傑首座自五臺歸將赴天台

偶逐孤雲下五臺又攜明月上天台衣傳異域曾留偈  
楓落長江見渡杯上界經行人世別天宮說法夢中迴

明朝相憶霞城遠空仰金繩覺路開

太常葛寺丞惠菊花賦答

重陽陶令嗟無酒笑我霜餘未見花  
黃菊忽驚移奉禮  
白衣從遣到隣家  
寒生客邸秋光滿  
秀擷踈英舞影斜  
三選縱令歸未得也應一粲墜烏紗

輓清暉亭林處士

芳洲蘭芷正霏霏  
忽訝中峰隕少微  
雅調何因寄流水  
孤琴空自掩清暉  
雨荒脩竹碁聲靜  
塵滿閒床鳥跡稀

為問沙頭鷗鷺侶此時誰與更忘機

輓林給事中正

少年簪筆侍承明誰復才華似賈生  
零落桂枝天上夢淒涼  
薤露世間情秋風旅櫬歸何處  
落日泉扉閉九京  
欲致生芻陳楚些不堪南望淚霑纓

過皖城謁余忠宣祠

寂寞孤城野水濱  
亂餘猶見幾家存  
女牆日落埋秋草  
官樹啼烏集暮雲  
百戰徒聞存國步  
孤忠誰復弔英魂

夜來遺廟空庭月長遂悲茄不忍聞

登小姑山和何禮部韻

宦遊久憶愜登臨此日憑高快賞心  
水盡平湖空外落天開絕島望中沉  
仙人遊珮春雲染神女宮鬟曉霧侵  
却羨漁舟煙浦笛數聲何處答清吟

泛舟漢江示同使何禮部韻

郢樹西連鸚鵡洲洲前浩蕩漢江流  
當年神女曾遺珮此日仙郎更泛舟  
雨歇鷗鳧屏底見烟光島嶼鏡中浮

平生最有滄浪意一曲傳君入棹謳

過鐵甕城

大江東去浩無窮江上孤城勢最雄  
天地今逢王業盛山河曾笑霸圖空  
寒潮落盡春雲白沙鳥飛來夕照紅  
欲訪遺踪尋海岳月明跨鶴共凌風

過昆陵懷浦舍人源

昆陵烟樹晚依依短徑行尋到夕暉  
吟舍空餘秋草沒故園時見野禽飛  
晉宮詞筆應誰繼聖代才名似子稀



此日懷君何處寫臨風惟有一沾衣

到南湖草堂

草堂舊隱白雲邊湖上春風耐醉眠別去松楸頻入夢  
重來猿鶴又經年移文漫假山靈誚謝病終須聖主憐  
明發江頭荀御動晚林重鎖綠蘿烟

登采石蛾眉亭

牛渚磯頭烟水生蛾眉亭下大江橫春歸楚樹浮空盡  
山隱淮雲入望平瓊館有才看倚馬錦袍無夢借飛鯨

停撓欲和渝洲曲都付吳歌子夜聲

宿巴陵聞笛

玉蘂飄殘月下聲空江秋入思冥冥怪來楊柳移關塞  
可是梅花落洞庭半夜旅魂隨調切誰家少婦倚樓聽  
曉來更覓龍吟處一點君山水面青

幕中贈張郎中

共投簪筆出蓬萊萬里從戎亦壯哉閩外論材需豹畧  
尊前說劍許龍媒中朝人物希先輩午夜文星接上台

坐見烽烟銷滅盡秋風  
聯轡到雲臺

寄郭麾使希武

青年建節似君稀  
千騎轅門擁鐵衣  
萬里獨留孤劍在  
三苗已見遠人歸  
西風暫及黃花醉  
遠檄時將白羽揮  
却笑叅軍淹病久  
未諧清論寸心違

九月朔日起覺寒甚

誰道炎荒暑氣蒸  
重陽未到早寒生  
也知天運隨皇運  
頓覺南行似北行  
季子貂裘猶未理  
楚人騷珮暫辭榮

晚來笳鼓城頭急祇有歸心對月明

贈閻帥張鑑

航海侯之孫

將軍簪弁舊名門奕葉曾承雨露恩  
汗馬樓船成往事玉符金券至今存  
節旄正倚雄邊重弓劍休嗟瘴海昏  
早晚馮唐勞帝想定從白下候歸軒

憑祥道中遇元夕有懷

曾向蓬萊捧壽觴良宵湛露沐恩光  
鳳笙曲奏梨園譜鼇背燈移火樹芳  
往事別來傷旅恨流年老去在他鄉

夷歌蠻舞誰能解  
馬上看山夜未央

與友人詠分得紅葉

一片飛來階下紅  
滿林驚覺夜霜空  
綠圭不剪封周弟  
錦字頻題出漢宮  
亂撲征衣山徑裏  
染成秋色夕陽中  
幾迴記得停車處  
錯把春華認晚楓

詠萍

忽見新荷長綠萍  
恍疑殘雨散銀屏  
幻身慣舞風前白  
弱質終浮水面青  
斗實當年歌赤日  
中達何處覓繁星

却慚誰是深根蒂雨約風翻總未停

七言絕句

懷仙寄上清何尊師

崇臺高映大羅顛三素流雲繞碧天王母不來春又暮  
洞門閒却古苔編

雲母屏風月影孤碧雲琪樹兩三株道童慣識鈞天舞  
偷向堦前教鶴雛

漢苑行

羞將團扇泣秋風  
懶掃蛾眉傍笑叢  
一自掖庭辭輦罷  
梨花殘雨鎖深宮

露凝仙掌月華清  
燈暗長門夢不成  
咫尺昭陽承寵處  
夜深猶自按歌聲

閨思

冷落殘箏十指疎  
良人遠戍近何如  
樓頭數盡南飛雁  
不見遼陽一字書

山居偶成

拂斷紅塵與俗違  
雲屏幾曲傍深依  
幽蘭小徑無行跡  
亂落松花自點衣

秋山吟望

一徑吟秋到石壇  
烟蘿遠映碧峰寒  
松邊獨鶴歸來晚  
贏得閒雲片片看

題畫美人

八駿瑤池去不迴  
蛾眉蕭颯鏡中哀  
至今楚水荒臺上  
化作行雲夢裏來



題張友謙倭扇山水

萬里空濛海上山  
僊人樓閣有誰攀  
只緣博望星河棹  
移得蓬萊到世間

題畫白翎雀

塞花原草度交河  
往日曾隨鳳輦過  
一自翠華消息斷  
空將遺恨寄雲和

題米老山水

海岳蒼前覓舊蹤  
蒼茫雲樹米南宮  
別來幾片青山影

都付寒鷗一笛風

題趙仲穆小景

疎烟淡月大堤傍  
遠樹連牆接水鄉  
子夜吳歌驚宿鷺  
風流宛似趙家莊

題鶴鵝

五陵鞍馬醉芳塵  
翠袖籠香錦翼馴  
一自雕屏辭鬪影  
露苔烟草幾回春

為周處士題枯木

風摧雨蝕大江濱  
寂寞盤龍百尺根  
莫笑支離空老却  
五陵烟翠幾枝存

為林尚默題新竹

粉籜新凋亂玉叢  
青青已覺萬林空  
軒廷未製伶倫管  
翠濕江南烟雨中

題畫馬

鳳臆龍鬃意氣雄  
霜蹄蹀躞襯輕風  
時清不作沙場夢  
日日承恩列仗中

題林檎山雀圖

人間不見函封帖  
粉墨驚傳落畫屏  
山鳥飛來林雨後  
蒼苔啄破子青青

題梨花折枝

庭院深沉簾幙垂  
雪香雲影露參差  
別來環珮春如夢  
為洗殘粧付阿誰

題王孟端畫梧竹

洞門一夜起涼颼  
萬籟無聲聽漸遙  
記得朝回明月底

井梧埋竹共蕭蕭

題馬苑小景

天際蛾眉淡欲消  
樓臺染出襯層霄  
玉簫吹徹鸞飛去  
人在西湖第幾橋

題僧自悅山中白雲

度壑穿林元是幻  
風收雨散却還空  
要知自悅與持贈  
都在青天片月中

題清源持上人萬壑松濤亭

一徑蕭森萬籟寒  
翠濤烟縠眇蒼巖  
道人夜半經行處  
悟入聲聞向上關

題畫鶯

半窻芳簾醉夢驚  
數聲拂曙繞花城  
憑誰借得東風力  
吹入簫韶雜鳳笙

題畫鷓鴣

原草飄殘作雪絲  
日斜馬上鬪歸時  
五陵別後傷心事  
零落涼州笛裏吹

送僧歸山

一錫東歸雪正深  
孤峰片月助禪心  
道門亦有叅方者  
踏遍空花何處尋

贈李進士

自古鐔津騰寶劍  
爾家況住湛盧峯  
盤根此日方看試  
白日青天見躍龍

王奉祠宅餞其伯氏之蜀縣令

我家仙令來何處  
又見雙鳧日下歸  
明發謝庭看玉樹

可憐片月憶光輝

都門飲散動行旌千里看花到錦城  
好借三巴江上水與君流作玉琴聲

夜泊潯陽江驛

度盡名山問楚湘扁舟此夜泊潯陽  
琵琶聲斷知何處江水江烟自眇茫

雨中過洞庭

昨夜南風起洞庭曉來湖上雨溟溟  
忽看天際鷺濤白



失却君山一點青

長沙懷古

孤城獨上思徘徊何似人間苦棄材  
寂寞湘南烟雨裡  
賈生還弔屈生來

重登岳陽樓望君山

南湖烟水接天流天際青螺掌上浮  
欲弔湘均何處是  
不堪重倚岳陽樓

常山道中即事

前山近曉樹蒼蒼野蕨初抽綠筍長一路春風如有約  
馬頭吹送落花香

提壺聲裡愛山春山色菁葱滿四隣便欲共尋荷芰服  
却慚簪紱苦縈身

黃州夜泊

岸籠芳樹水籠煙山月江風共客船半夜洞簫聲起處  
不知誰是玉堂仙

宿鄂渚

禰衡洲古白雲低  
庾亮樓空綠樹齊  
惟見晚空漁艇火  
隨風遠過漢陽西

陳司馬舟中賞牡丹分韻得歡字

折露移雲出楚山  
錦筵畫舫鏡中看  
洛陽久負春風約  
相對無辭盡醉歡

黃陵廟

芳洲烟草碧萋萋  
古廟雲深落日低  
剝盡殘碑無可問  
春山惟有鷓鴣啼

蔚林與陳司馬言別

鶴響嘶風千嶂裏  
鷗樓衝浪萬灘中  
暮雲春樹重重見  
客裏相思更不窮

浚州驛

客裏浚陽暫泊舟  
驛樓官樹晚烟稠  
多情誤作琵琶夢  
驚覺蠻天瘴雨秋

潢州憶丁顯

故人自是龍頭客  
何似南荒久不歸  
欲把一觴陳楚些

月江烟雨正霏霏

登月江樓

仙人槎浦也

朝來一上月江樓  
江雨長涵瘴水流  
望斷釣槎人已遠  
青山點點是邕州

左江錄似友人

左江江水日潺湲  
鳥語沙棠住百蠻  
莫道天涯應在此  
交州更隔萬重山

交州即事

一騎衝嚴到市橋夕陽烟樹草蕭蕭居人猶指高駢塔  
碧瓦朱甍尚未凋

莫道平居是百蠻烟江花月也同攀一從烽火連天後  
縱有神珠去不還

交州病中錄似諸友時軍中絕餉以手帖干主帥

索糧

問病尋方事總虛漫勞車馬慰躊躇三年玉署蘭臺筆  
學寫顏公乞米書

答謝主帥

半敬烏帽病叅軍  
萬里從戎未策勲  
不有轅門賢主帥  
飄零誰與慰殘魂

曳裾進作轅門客  
擁節終慚使者星  
投李報瓊何日遂  
空餘豪氣倚青冥

病中懷故山

遠向清溪掩石門  
碧蘿烟帳鶴成羣  
一從誤作遊仙夢  
誰管秋山幾片雲

裊裊裡陰石徑斜野人迎住近烟霞別來門外滄浪月  
開遍青松幾度花

九日有懷

故園松菊應無恙上國新醪也自佳兩地思歸俱未得  
一身長笑在天涯

九日黃司空招飲不赴書以答之

菊觴莢豆有佳期客裏逢迎慰所思不是叅軍招不赴  
病來烏帽未勝吹



為馮叅議貴題畫風竹馮沅湘人曾為給事中

移得孤根過洞庭  
禁埤曾送珮珂聲  
如今座上涼颼滿  
一掃炎荒瘴雨清

寄莫叅政時在寶陸破賊

九月西風太白高  
笑麾白羽氣偏豪  
明朝掃振轅門捷  
準擬盧江倒濁醪

送趙侍郎毅還京

富春江畔草萋萋  
旌飾如雲鐵馬嘶  
帳下為君斟別酒

京華歸夢使人迷

晚眺鬱孤臺

百尺高臺却暮寒  
虎頭城枕碧雲端  
縈迴二水蒼龍合

流下前溪十八灘

雨中登快閣寄畦樂處士

江風吹雨晚霏霏  
江上孤鴻濕倦飛  
欲向滄波期釣侶  
清時未許著荷衣

江上見酴醾分得人字

向來同醉帝城春  
馬首東風落絳茵  
玉架錦屏消息斷  
只今誰是冶遊人

閱兵呈總戎

時積雨大霽

青天昨夜將星明  
際曉風雲氣色清  
試向閱兵臺上望  
豺狼何處敢橫行

將臺高築颭旌旗  
百萬貔貅試閱時  
上下風雲同一色  
天心元與將心期

凱歌四首

大將南征討不庭節旄萬里耀威靈  
棘門五夜狼星墮  
直挽天河洗甲兵

萬里炎荒貼海平  
腥波千尺舞長鯨  
王師百萬從天下  
瘴雨蠻烟一霎清

瘴海樓船一夕過  
瀘江鐵騎曉鳴珂  
皇家飛將功成日  
不數當年馬伏波

熠熠參旗護陣門  
喧闐鼓角擁回軍  
當年麟閣休專美  
此日雲臺更策勲

又四首

六龍曉駕出居庸萬里沙場一掃空無限山川歸奏凱  
一時天地為昭融

旗翻魚海三秋雪馬蹶狼居萬里冰五夜旄頭橫陣落  
六師齊和凱歌聲

燕支山下起秋風飲馬河邊日射虹從此玉門開不閉  
欣逢南北一家庭

六符同覩泰堦懸壯士長歌北到天萬國衣冠陳玉帛

兩京日月照山川

七言排律

暮雲春樹送張謙

歧路逢君賦遠遊，傷心雲樹粵江頭。  
輕陰向夕花前度，秀色將春雨外浮。  
却訝梁園看漸杳，恍疑巫峽散還收。  
白衣靄靄迷征旆，翠幄籠籠引去舟。  
惜別不緣今日賦，高情那記昔人留。  
遙連蜃氣江東暝，迥帶猿聲渭北愁。  
夢覺微茫沙上驛，醉來掩映水邊樓。  
宦情已共青霄永

別思空隨綠水流，若到上林成五色。好分餘蔭及南州。

南宮呈大宗伯

東壁文章映列曹，南宮冠蓋富英髦。名垂霄漢當時重，身接風雲盛世遭。花引爐香間整珮，風移扇影見揮毫。蓬萊宴罷春雲集，鳩鵲朝回朔雪高。坐客盡攜毛遂穎，故人曾贈呂虔刀。獨憐壁海才華地，久逐詞林姓字叨。已覩重光歌舜禹，更期獨步訪夔臯。天瓢若借恩波及，未必臨風嘆二毛。

醴泉應制時有禧事青禽白鶴先集慶雲甘露降  
寶筵初建曉蒼蒼大駕躬臨禮玉皇白鶴青鸞昭孝感  
慶雲甘露兆佳祥更傳聖水符前代忽訝靈源湧上方  
玉竇泛春時脈脈金罍貯月乍泱泱薦來只擬羞萍實  
挹處渾疑剖蜜房玄酒奠壇同瑩徹黃流在筭等芬芳  
漫誇沆瀣移仙掌迴謝蒲萄入醉鄉瓊液久疏神島瀝  
瑤池曾引帝臺漿中元表異還超漢貞觀論功遠邁唐  
妙絕醍醐班十瑞嗽餘雲母已千霜冰壺瀉罷同欣忭



天乳霑迴等壽康自媿涓微無補報祇應上祝紫霞觴  
寄題張真人耆山精舍

旭日初霞晃翠屏琅玕芝草近珠庭玉簫吹徹鸞初下  
丹液凝成鼎自扃海濶傳緘曾命鶴夜深飛佩欲騎星  
洞中石瀨移仙乳雲際松根長茯苓象軼朱幡朝太乙  
寶函金訣授玄經凡情久斷懸應解塵劫都忘慮已冥  
却笑蜉蝣同草露也應歲月羨椿齡何由共把浮丘袂  
指點三山掌上青

贈馮叅議貴馮以給事中從軍交趾擢任其職

平蕪古堞晚蕭蕭  
秋盡炎荒草不凋  
北望休嗟邊徼遠  
南來已見瘴烟消  
受恩部節分清要  
託顧專城協上寮  
海國諸生多在席  
中朝老將半迴貂  
文雄慣草軍門檄  
地僻曾迂使者輶  
萬里正看搏羽翼  
一枝從此詫鷓鴣  
座中論俠心逾壯  
幕下延材氣不驕  
會見徵書還賈誼  
未應投筆羨班超  
愧余感遇情初洽  
念爾相逢意獨饒  
孤館療除頻見過  
遐方溽暑不辭歎  
呼童日午尋茶臼

隔壁時來問醴瓢正喜詞華泉倒峽俄驚歲月斗旋杓  
星河耿耿當窻見島樹依依入望遙一曲劍歌何處寫  
不堪聽盡海門潮

南海劉閩帥席間有成

雨收雲散海天空萬里相逢興不窮畫戟轅門閒夜月  
高堂粉署坐薰風也知弓劍長懸久且仗壺觴宴坐同  
樞馬亂嘶邀上客佩魚初安列羣公芳尊瓊醴蒲萄色  
錦席雕盤荔子紅作客久經南瘴遠當筵偏激劍歌雄

玉繩低繞雙星外銀甲移來一笑中醉後忽思驃騎幕  
燈前含笑看吳鴻

續書評 附

蓋間規矩方圓之至聖人以體天地之撰以類萬物之  
情故竒圓而偶方轉筆為圓摺筆為方方之平為準圓  
之直為繩陰陽五行所以成象成形也書以方圓平直  
為之主而輕重大小低昂長短邪正寓其變焉上字之  
於下字左行之於右行橫邪踈密各有攸當所謂增一

分則太長虧一分則太短魚翼鳥翅花鬚葉芒油然粲  
然各止其所上下連延左右顧瞻意象森嚴血脈生動  
縱橫曲折無不如意毫髮之間直無遺憾其四面八方  
巧於善陣所謂紛紛紜紜闐亂而不亂渾渾沌沌形圓  
而不可破豈足喻其妙哉必其一字之間自應絜矩一  
篇之中可無絜矩之道乎故右軍書古本最善行列近  
世惟趙吳興深得其旨然就一篇之中固皆欲佳必有  
數字登峰造極者為之主一字之中雖皆欲善必有一

點一鉤一披一拂主之如兵之有將石之有玉使人玩  
繹不可名言若握筆則虛圓正緊四字盡之其餘以意  
變通則壓捺鉤揭抵拒道逸其說益密矣至於用筆之  
功鋒芒毫釐之間正用之側用之偏用之批答用之背  
向用之承覆用之傲讓用之低昂用之長短用之逆而  
順之下而上之襲而掩之空中擲之架空搶之窮深掣  
之頓挫之鬱屈之周而折之抑而揚之藏而出之垂而  
縮之往而復之盤旋之踴躍之瀝之使之入血之使之

凝築之如穿按之如掃注之趨之指之擢之揮之掉之  
提之拂之收而縱之蟄而伸之淋之浸淫之使之茂卷  
之感之雕而琢之使之密覆之削之使之瑩鼓之舞之  
使之竒喜而舒之如見佳麗如遠行客過故鄉發其怡  
怒而激之如撫劍操戈介萬騎而馳之發其壯哀而思  
也低回聚促登高弔古慨然而發其悲樂而融之如夢  
華胥之遊聽鈞天之樂與其簞瓢而樂之也忘情筆硯  
之間和調心手之用不知物我之有間體合造化而生

成之也而後為能書之至爾

自述諫

王偁字孟揚其先東阿人宋寶元康定用兵西方士有  
沒於吳昊者王氏遂為西方人元有天下其地最後附  
賜姓唐古氏高祖王父某從下江淮授武德將軍總管  
鎮廬州曾祖王父某祖王父某相繼襲爵改上千戶沒  
俱葬大蜀山下先府君某當搶攘以材用薦者調民職  
廬州路治中歷江南福建行省郎中至階朝列大夫潮



州路總管當時稱廉吏第一人所蒞政績卓異字惠小  
民攘剔豪右禮賢士植綱紀民奉以祠元運改玉度時  
不可為浮海去之道閩閩父老遮留退居永福山中為  
黃冠服者十年朝廷聘之恥為二姓臣遂自引決嗚呼  
是時偁方生九齡家巖然壁立太夫人守節自誓艱難  
備嘗手疏先君之蹟與古今豪傑大畧教之外王父姓  
劉氏諱某由宣文閣博士出簽閩憲再召入為秘書丞  
沒王事贈嘉議大夫福建行省叅知政事淹貫靡不究

博古好雅翰墨之妙絕當世侷不及見之聞先生聞過  
齋吳公學行醇偉為士林望與先君交誼相與也先君  
沒時屬侷夫子教之第未弱冠夫子沒俵俵罔依歸賴  
外王父遺圖書手澤多杜門自研澁少多病負第者三  
年莫臻其至弱冠入庠序與陳君從範遊陳蚤入聞過  
夫子室獲其指授懇懇汰其瑕礫示以瑜瑾一旦斯發  
節矣洪武庚午賓興歲領薦方去海濱觀光上國會試  
禮部不利例入國子處縉雲朱先生館下日求齊魯士


與談訪其遺風及四方之賢者而私淑之上表陳情乞  
終養高帝憫之南歸越震澤徘徊吳會間不敢留趨侍  
湯藥膝下始冀收其實而從範已物故閩故老亦凋剝  
殆盡四涕毗落無可與語晚得晉昌林誌相與論學假  
以模範抗顏為多暇則窮幽極深徜徉物表趣豁如也  
未幾太夫人捐館舍嗚呼居喪不敢渝禮既合先君塋  
廬墓下者六年永樂初元以推轂者至京師待命黃閣  
因自陳願處學校勵人材不允授從事郎史官翰林檢

討進講經筵以文字供職時錢塘王洪擅詞垣與同官  
一見過相推重勅修大典萃內外儒臣及四方韋布士  
毋慮數千人濫竽總裁之列大將軍英公覆征交趾辟  
居幕下於是泛洞庭浮沅湘歷九疑弔蒼梧徵兵南海  
既而窮象桂道五管觀師於日南九真之交時有贊勳  
大將軍待以為捐客歸仍守其舊官先娶鄭氏新安人  
前名御史潛之孫女先卒再娶薛氏閩故族孝養於姑  
貞淑內得其亮生男一人振女子其一人其次男拱女

子某一人側室李氏出也此族系出處之概少銳志於  
有為毅乎思準古以馭今而用弗以施學雖服羣聖獵  
百家窮幽明亟於聞道而質淪蕪杌遇登高弔古慨然  
發其悲壯愉樂一寓於文若詩而辭媿土苴其為人則  
似顛而容似傲而恭家貧而心樂身困而處裕然疾惡  
太過遇權貴不能俯首下之任情以直不能斲以徇人  
成功此其見短於世也見人善不啻若已有之雖匹夫  
問未嘗不竭以盡與人交內外不敢携此則自以為長

焉若夫惋以為終身之憾者，盡失所怙，哭吾父，幾不能生。初知學而哭吾師，如哭吾之父焉。未幾哭吾友，如哭吾之師。比得祿而太夫人不逮，養有子教之，未立荷兩朝之恩，而莫一舉報。嗚呼！况茲身繫絁縲，西山東陵，清而未分，孤臣之號，庶女之慟，南音之戚，梁岸之章，孰為發之日者？以支幹推定人禍福，生死謂吾年日，皆庚迪於丙歲，在闕逢麗於鷄火，其弗延矣。嗚呼！其果然耶？孟子曰：桎梏死者，非正命也。晝夜之理，吾曷念之？因述其

系而極之以呼天之辭用自誅俾後之為烏鳧為螻螻  
在陽侯在回祿或返其道骸而招其魂魄或藏其衣冠  
庶令有考者憫其志而哀之焉辭曰予概觀古之人怙  
材者恒困於弗施志大者惟顛頓之屢躋嗚呼孟揚矧  
爾乏古之才而尚其志焉得不竒於時而諉於戾爾負  
而君爾負而親嗚呼誰其白之悠悠蒼天



虛舟集卷五